

2 KORINTOFÓ

Kukue Nuáfə Ko Paulo Ləwəni Útə Korintofə

¹ Mə, Paulo, wə eyε lə Onanto eto lelabi əsua mimfiani Bonamute Yesu Kristo eto ətənkpee, mə ku bo əyimisani Timoteo nle kukue komfo bəwəni kətə mi, Onanto eto bafokanəfə eto ditsyukpa nə nkpe lə Korinto ku betidi ba kenke Onanto eto betidi lə Akaia eto kasə kenke.

² Bəle bətə bəə Boanto Onanto ku Bonamute Yesu Kristo eto lefonə ku diyua lə disieko mi.

*Paulo Aasə Onanto Ani Lə Bo Kanyinyənyə Saa
Isua.*

³ Bitə lə bufi atəsε butə Onanto wə ni Bonamute Yesu Kristo eto Anto. Wə ni anto wə ləənyə bo kaminsə, nya woawunsəko bo. ⁴ Waamansə bo ləkə lə bulə saa bo leetu bo, itə bə lə bo tsya lə bofo bo bətsyuə bəwunsəko lə mə bulə saa kəmiə. Nya fe kase Onanto laawunsə ko boo, nko ke ele bə bo tsya wunsəko bo betidi ba nle kanyi bunyə nε. ⁵ Itsyise fe kase boənyə kanyi kpə fe nka eto okle Kristo tsya dínyə, nko ke ini bə lə bo ləniyifoyifo ku Kristoo, Onanto tsya laamansə bo ləkə sitinti nε. ⁶ Lə bəte bo ohiā, bəte bo ohiā bə lə Onanto lə omansə mi ləkə, lə ofo mi lə nkpe. Lə bəmansə bo ləkə, bəmansə bo ləkə itə lə Onanto lə omansə mi ləkə bə lə befo buńyə kekleke lə mi kanyinyənyə kamfo eto okle əsua fe kase bo tsya leeyifo lə kanyinyənyə kamfo eto okle seka kəmiə. ⁷ Kulesa saa embofo bo

kusubebe læ mi disi butinkəsə, itsyise fe kanyi ka biənyə fe bo ke sekaa, nko ke Onanto loomansə mi ləkɔ fe kase úkamansə bo tsya ləkɔ seka.

⁸ Bayimi, bola boə bete bulə bo eto okle dítu bo læ Asia eto kasɔ kukɔnɔ. Kanyi ka búnyə ákɛ ale itə bo tinti itə bə bóensibe kusu boə bɔɔkɛ nkpə kulaa tsya. ⁹ Lə sitintii, iyifo bo fe dikpənkpi bálo bo! Fɛɛ nyamfo əbə itə nko bə læ bufi bo kusubebe butəkə læ Onanto wə laatakasə bekpənkpə ketsyiko ɔkɔmə kaboko nkpə əsuə, inni læ bo mate eto əsuəale əsuə. ¹⁰ Úləkə bo utsyiko læ ukpə eto bulə kplɛ kəmiə. Nya unsi wuukələkə bo tsya lefe saa. Sitintii, wə ini bɔnɛ kusu bobə boə usi wuuləkə bo tsya kokoko, ¹¹ læ kase biato ola læ bo disi eso. Itsyise læ betidi kpə aato ola, Onanto ebɔnɔ mə olatoto nya betidi kpə lɔɔsɔ wə ani læ kase ówunsəko bo eso.

Paulo Átɛyi Lesa Nə Eso Ɔtsyi Wə Ketsyue Ɔwuninsə.

¹² Lesa nə eso boabesə əsuə kato ni bənkə bo akɔəsi anlo bo dikpi, itsyise bóɛ bo əsuə kukɔnɔ læ betidi kenke eto ənəmi. Nya bo ku mi eto nkpəsiəsiə áyɛ læ Onanto eto kusu əsuə, nya kawɛ ləmbə læ nnya kəmiə. Inni kawunsiə kamfo eto kobetete əsuə buufi bunsɔ nkpə ku mi nko, bomu læ Onanto eto lefonə ku wə əsuəale nnya əsuə búməkəko eso. ¹³⁻¹⁴ Asa nnya biofo bokla kanɔ kasɔɔ, nnya hã ete boawɔni kətə mi nɛ. Nya ite bə asa nyamfo eto ətsyuə eto kasɔ ete bɛnɔ mɔmɔ tsyaa, mfo nnɔ miə biubə bɛnɔ bo kasɔ belosə kenke, nya yuutə bə biofo əsuə kato bobesə læ bo disi, nya bo tsya loofə əsuə

kato bobesə lə mi disi lə Bonamute Yesu eto diyi nəmə əsuə.

¹⁵ Lə nnya mimfo nyamfo kenke minɔ nko esoo, minka nsusu búləkə miə eni lə nka mi ɔflo bɔyɛ bə lə mi disuəyua lə diyifo sinua. ¹⁶ Tutεε, eni lə mbə nyε mfó lə ntɔ lə Makedoniaa, ku lə nle businkli nle bubəə, bə lə bəwunsəko mε lə nsu Yudea. ¹⁷ Se mínləkə mɔ nsusu miə lə nyifo nkoo, bote nyamfo nle bə meenyifo asa lə kusu əsuə? Nya bote nyamfo nle bə kawunsia kamfo eto nsusu meefi keyifo asa fe utidi wə laatsyi wə nsusu kawuninsə mləməmlə katɛyi nkə, ee ku owo lə lefe lɔni nəmə ke əsuə?

¹⁸ Bomu fe kase Onanto laateyi ɔnukuaλεε, nko ke ini lesa saa nə bówɔni bótsyese mi ni nε. Nya inni fe kase utidi laakpɔ katɛyi nkə ee kesinkli katɛyi nkə owo, inni. ¹⁹ Onanto eto Ubi Yesu Kristo eto ditiki nə mɔ ku Silvano ku Timoteo lébe letsya bútə mii, inni nwə laateyi nkə ee usi ɔteyi nkə owo tsya. Bomu uyifo nwə eto ditiki ni ee lefe saa. ²⁰ Itsyise Onanto eto kenye saa ka ɔteyi útsyəə, əbə itə εyε lə Yesu Kristo əsuə. Nyamfo eso boateyi εyε lə wə əsuə boənkə, “Ibə itə nko.” Bə lə bufi atesə butə Onanto. ²¹ Onanto ətə nkə bo ku mible kenke yifo bani ku Kristo nya wə kosate díləkə bo útsyə nkə buyifo wə kekyifo. ²² Wə ni nwə dítakə bo léba útsyə úfi óte nkə wə mbə bo lefe saa, nya úfi Ləwɔnɔ Kenke ókpe bo lə akɔəsi fenkə lekpotstyətsyə itə lə asa nnya kenke buubə bofo butsyiko lə wə ani.

²³ Onanto ni adansie lə mɔ ku mi nti nkə kaminse mínnyə mi eso mínnyε Korinto busu nε. ²⁴ Inni bənkə lə bufi lesa nə bofo bɔnɔ

bonyinkə mi bokpe eso, itsyise mi bofokano fe dińyə keklege koko. Nyaso bonle keyifo buyifo ku mi bə lə binyə disuəyuə nɛ.

2

¹ Nyaso nyifo mo nsusu minkə mensiembubə mi oflo bə lə mbə nló mi ani. ² Itsyise lə mbə nló mi anii, owoe nsi looke wə lookpe me disuəyuə, enso mimba mə ke mintə ani léló mfó? ³ Nyaso míwoni kukue keklege nkomə míntsyese mi nɛ, itsyise mánla miə lə mbə mfó, yuutə buitə bə ani ló mɛ. Fɛɛ mi ni betidi ba ele bə bekpe me disuəyuə nɛ. Nya mfo nno miə lə nle disuəyuə bunyəə, mi tsya ənyə disuəyuə nkomə ke. ⁴ Sitintii, kukue ko míwoni míntə mi mfóo, nwoni ko lə bulə kpə ku lə binəntu əsuə. Nya mánwoni ko bə lə itə ani lə eló mi kutsyuə, bomu bə le binyə bitsyə lekpo kase maala mi sitinti eso.

Paulo Éfi Obuayifo Utsyuə Eto Lebua Ɔtsyɛ Wə.

⁵ Nyaso lə utsyuə útə ani áló utsyəə, inni mo mate ete úyifo nko. Bomu bofo boteyi lə kusu kutsyuə əsuə boə bomble kenke utə ani léló. Fɛɛ manla miə boəkə wə kotome bosonsə. ⁶ Kase mi kpə díkənə utidi əmfo koto lə mi ntii, əsiə itə wə. ⁷ Nyaso bifi lesa nə úyifo betsyɛ wə lə bekpe wə nkɛale bə lə eyɛ wə bulə lə eló wə ani kenke. ⁸ Lə nyamfo esoo, nle mi lekpa kpa miə bekpe wə nkɛale lə biləkə bete wə biə bisi biala wə sitinti. ⁹ Nwoni mi kukue komfo itsyise nla miə lə mfi nto mi mbe miə bińyə keklege ku lə bietsyue asa nnya kenke maate mi koto lefe saa. ¹⁰ Lə bífi utsyuə eto botakebu betsyɛ

wæ, mintsya éfi ntsye wæ. Nya læ mfi botakebu butsyuæ ntsye læ butsyuæ kpe bæ ele bæ mfi ntsye kulaa tsyaa, læ mi eso mímfí míntsyé læ Kristo eto ənəmi. ¹¹ Nnyifo nyamfo nko læ kase Obonsam læmbotafa mi, itsyise buyi wæ kobe.

Paulo Ála Nkə Lə Ɔnɔ Mə Etiki Lə Tito Ɔflɔ.

¹² Se mínsu míndufə Troas eto Umə miə læ nsu mbe Ditiki Sɛɛ nəmə letsya itsyi læ Kristo əsuə, nnyə miə Bonamute ébɔsini kusu itə keyifo kamə læ mfó. ¹³ Fɛɛ ílə mə tinti itsyise mənnyə mə ɔyimisani Tito mfó. Lə nyaso ntɔ kusu nya mímfə mínsu Makedonia.

Boətəkə Kato Lə Kristo Eso.

¹⁴ Fɛɛ boasɔ Onanto ani! Nya ɛye læ ləniyifoyifo ku Kristoo, Onanto aayenko bo lefe saa fe ndomufɔ ba lætəkəko Kristo læ wə kato-butəkə eto bɔye əsuə. Nya Onanto aaye læ bo əsuə kabe Kristo letsya kate kawunsia kenke fe kase nnuəbi bo laanyi fififi eto ufiebi laaye katsyo kesu kalebe saa. ¹⁵ Itsyise buyifo fe ufiebi wə laanyi fififi wə Kristo dífi útə Onanto wə leesensə kesu betidi ba nye læ kusu sɛɛ əsuə itə bofo ku mba nye læ kusu bua əsuə ntɔ læ bonya əsuə. ¹⁶ Itə betidi ba lembunyə nkɔpə manloo, buyifo fe ufiebi wə laate mə bæ bonya eto ole beni. Fɛɛ betidi ba luunyə bofo, buyifo fe ufiebi wə lætə nkɔpə manlo itə mə. Nya læ sitinti, owoe lofo keyifo kamfo eto okle buyifo? ¹⁷ Bunte fe betidi kɔpə ba laafɔ Ditiki Sɛɛ nəmə kayenko fe bikə bia baate læ asi. Fɛɛ se ini Onanto díləkə bo esoo, buyifo bani ku Kristo nya boedi etiki læ ɔnukuale əsuə læ Onanto eto ənəmi fe Kristo eto beyifoyifo.

3

Onanto Ɖtə Bo Nkpə Lə Kenyeklekle Fọfọ Ɖsuə.

¹ Bote nyamfo nle nkə busi bəle bo əsuə bətəsə? Fe kase inte itə betidi bətsyuə sekaa, isi ehiā kukue bofo ketsyiko mi oflo nye kaboko mi itə bo buləkə kate? ² Mi kosate ni kukue ko nkpe bo, ko bákawɔni bákpe lə bo ketu kəmiə itə le utsyuə saa lofo bote ku lə okla. ³ Ekpra wuee bə Kristo kosate leyε lə bo əsuə nya útə nkə bofo bɔnɔ. Nyaso mi ni kukue ko ówɔni. Inni awɔnisa eto ntu úfi ówɔni asa nyamfo. Bomu Onanto Eto Ləwɔnɔ nə nsi nkpe eto əsuəalə úfi ówɔni nnya. Nya wánwɔni nnya lə aba əsuə fe kase úyifo nnya lə lefe nə léfe mmə, bomu lə betidi eto ketu kəmiə.

Kenyeklekle Fọfọ Eto Batɔyε.

⁴ Bofo bətɔyi nko boə bokpe kənyəkə ka Onanto díte bo eyε lə Kristo əsuə eso. ⁵ Bumbə kənyε bofo bətɔyi boə bokpe əsuəale lə bo əsuə boafọ keyifo kamfo buyifo. Bomu əsuəale nnya nkpe bo etsyi Onanto oflo. ⁶ Wə ni nwə díyifo nkə bəke əsuəale lə bɔfiani kənyeklekle fọfọ kamə eto batɔnkpe. Nya kənyeklekle fọfọ kamfo anyε lə afi koko nnya bávɔni bətsyə əsuə. Bomu kayε lə Onanto eto Ləwɔnɔ əsuə. Itsyise afi nya bávɔni bətsyəə, aaboko ukpə. Fεε Onanto eto Ləwɔnɔ ətə nkpe.

⁷ Onanto eto afi nnya bávɔni kokoko mfóo, eyifo etiki nnya bávɔni bətəkə lə aba əsuə. Nya lefe nə bəfi nnya bətə betidi, Onanto eto diyənde ətə bə Moses eto ənəmi əyənde. Nya íte bə diyənde nəmə ələkə ibu lə Moses eto ənəmi

tsyaa, Israel bebi mámfo buńyà kabe wà ànàmi. Nya là afi nnya laafo bo dikpànkpi bolo àlèkà àsuà ete ku Onanto eto diyànde nkoo, ⁸ nya là wà Lèwàno eto lèbàbi eto diyànde so ditute famfamfa. ⁹ Nya là kòfi koko ko laalo utidi dikpànkpi áfo diyànde nàmfo eto okle butà, ele bə bote boà Ditiki Sèè nà leeyifo bomba leeyifo kasèè eto diyànde eboso ditute eto lele kenke. ¹⁰ Bòlè bətèyi nko itsyise diyànde kplè nà nkpe mfo mómòò, éyifo dinyàndà nà lèkè kò fe leni. ¹¹ Nya là lesa nà lèkè ità lefe kliminti ànyà diyànde nàmfo eto oklee, nyalè lesa nà nte ità manlo manlo eto diyànde eboso famfamfa. Ni diyànde so nàmfo kon.

¹² Nya se bonkpe kusubebe là lesa fòfò nà ləmbə kalokò esoo, nyaso boedi etiki saa wuee ku okòè nè. ¹³ Nya bunte fe Moses wà dífi ofiamè úti wà ànàmi ità là Israel bebi là buunnyà bə Onanto eto diyànde nà lèkè là wà ànàmi là bəni kalo. ¹⁴ Sitintii, mə nsusu mányè etsyo, ibə ese là mi. Ite fe ofiamè wə mfo eto okle si uti mə là nsusu là balè kòfi koko eto kukue komfo eto ditiki bokla. Itsyise lesa nà hā luutà bələkə ofiamè əmfó bato bakpe ni là utidi là ufi wə əsuà okpe là Kristo əsuà. ¹⁵ Sitinti ibə ese taa mmii, là balè Moses eto afi eto kukue eto etiki nyamfo boklaa, iyifo fe ofiamè əmə si uti mə là nsusu. ¹⁶ Fèè là utidi átsyi əwuninsə úfi əsuà útə Bonamutee, ófiamè wə leeti wə nsusuu, aasini nya waano etiki nyamə kasò. ¹⁷ Nya mómòò, Bonamute wə bənlè bokpadi mfo, ni Lèwàno nàmə nè. Nya kaka Bonamute eto Lèwàno nkpee, àtə kusu ità əsuà əsuà eto busiə. ¹⁸ Nya bomba mblè kenke

ba kulesa saa enti bo læ ənəmi bɔnlɛ Bonamute eto diyənde nəmə buləkə kate wuee. Balɛ bo bɔtsyi kawuninsə kətsyə læ wə ditsyəbi nəmə əsuə nya bo diyənde nəmə nlɛ kato bobɛ kakpɛ. Bonamute əmə ni Lɛwɔnɔ nə nlɛ nyamfo buyifo nko nɛ.

4

Bute Fe Ekplibi Nnya B́ato.

¹ Onanto læ wə kaminsənyənyə əsuəə, dífi keyifo kamfo ókpɛ bo læ kɔni. Lə nyaso ani anló bo læ ke buyifo əsuə. ² Búləkə ato læ asabiombiɔ ku afanisa saa buyifo əsuə. Bóni awesu saa ku Onanto eto ditiki nəmə bɔtsyi kawuninsə læ kusu saa əsuə. Bomu boələkə ɔnukualɛ kate. Boəsiə nkpə bo lekpa wuee læ Onanto eto ənəmi itə utsyuə saa ebunyə bo ditsyəbi sɛɛ utsyə lekpo. ³ Nya læ Ditiki Sɛɛ nə boabé letsya mfo eyifo akulasa itə betidi betsyuəə, betɛ biə mba nyɛ læ konyasu əsuə ete iyifo akulasaa itə. ⁴ Nya betidi bamfó mámfɔ bánɔ itsyise kawunsiə kamfo eto olo, Obonsam, éti mə ənəmi. Nya weeti mə kusu bə baamfo Ditiki Sɛɛ eto lekpasə nə mə bunyə. Lekpasə nə laabɔ ketsyi læ Ditiki Sɛɛ nə ditsyi Kristo eto diyənde əsuə wə ni Onanto kosate eto ditsyəbi. ⁵ Boambe bo kosate eto əsuə letsya kətə mi, bomu Yesu Kristo ni nwə eto ditiki boabé letsya kətə mi boə wə ni Bonamute. Nya bo eyifo beyifoyifo itə mi læ Yesu eto disɪ eso. ⁶ Onanto wə lɛtɛyi læ kawunsiə eto ketsyikokɔ nkə, “Lekpasə yənde lɛbɔ ditsyi ketuntu əsuə,” ke ni Onanto wə dítə nkə wə lekpasə yənde læ bo ketu kəmiə

læ ditæ nkæ bunyæ Onanto eto diyænde næ nle buyænde læ Yesu Kristo eto ænæmi butsyæ lekpo.

⁷ Fæε bomba léfo asafokoya nyamfo itsyi Onanto ɔflo, te fe sɛfɔte eto ekplibi. Nya ite nko læ ilækæ eté sitinti bæ, inni bo ɔflo æsuæale kplε kenke nyamæ ditsyi, bomu itsyi Onanto ɔflo.

⁸ Boænyæ kanyi læ lefe kpæ æsuæ, fæε bulæ bomæ aanso bo ani. Yaakpe bo nsusu bulæ, fæε yaanló bo ani. ⁹ Balo kpæ ætækæko bo, fæε Onanto aanyani bo kætsyæ. Itæ bæ baayinkæ bo kakpe læ kasɔ tsyaa, bambiasæ bo. ¹⁰ Lefe saa, bo æsuæ eto sinæ ænyæ kanyi ka laale Yesu eto ukpæ eto okle. Bæ læ nkpæ bo bunsi, læ bole Yesu eto nle.

¹¹ Læ sitintii, nkpæ bo bunsi kenke kpe læ ukpæ eto bulæ kæmiæ læ Yesu eto disi eso bæ læ bænyæ Yesu eto nkpæ eto ditsyæbi læ bo æsuæ eto sinæ bætsyæ lekpo læ bo. ¹² Læ mmæ esoo, ukpæ læ keyifo læ bo lefe saa, fæε nkpæ læ keyifo læ mi æsuæ.

¹³ Båwɔni læ Awɔnisa Kenkε eto Kukue æsuæ bænkæ, “Mfo nnɔ, nyaso mímbe wæ letsya nε.” Nko ke ini bæ bo tsya áfo bóno eso bóbe Ditiki Sεε næmæ letsya nε. ¹⁴ Nya buyi boæ Onanto wæ létakasæ Bonamute Yesu utsyiko ɔkɔmæ óboko nkpæ, wæ æmæ ke ebotakasæ bo tsya ku Yesu oboko nkpæ nya wookpa bo ku mi kenke oboko wæ ænæmi. ¹⁵ Mi lelekæsæ eso asa nyamfo kenke nte nko. Nya kase mba Onanto nle wæ lefonæ bote nle bufui kakpe, ebutæ bæ mæ leninsɔ læ lebe kato lekpe bæ læ befi batæsæ Onanto.

Buunyæ Dibu Ku Dusuænyuæ Kpæ.

¹⁶ Læ nyamfo eso boæntæ ani laalo bo, læ bo æsuæ eto sinæ læ buku kulaa tsyaa, buyi boæ bo læwɔnɔ

kəmiə eto nkpə lɛ boto kətəkə lefe saa. ¹⁷ Nya kanyi sɛkɛ ka bɔnlɛ bunyə mɔmɔɔ, embutsyə ɛklɛ, bomu bɔlɔ kanlɛ bo əsuə kətsyə itə diyənde kplɛ nə ləmbə kalosəkɔ. Boəmbofo ni bufi katesɛ ko kanyi saa. ¹⁸ Inni asa nnya boənyə əsuə boefi bo ənəmi kətəkə, bomu lə asa nnya boənnnyə əsuə. Nya asa nnya boənyə ku ənəmi te itə lefe kliminti ditsyuə ete. Nya nnya bo ənəmi lembofo bunyə, te itə lefe saa.

5

¹ Nya lə bo əsuə eto sinə sia ni dibú nə kafo boəsiə lə kasɔ mfo abaa, bokpe diyo bamba lə Onanto eto Umə kato. Nya diyo nəmfoo, wə kosate dífi wə ani óto, nya diuńyə lefe saa. ² Nya lefe nə əsuə bunsɪ lə kasɔ mfo lə sinə əsuə, boala kawɔnɔ. Nya boabe kusu kekkeke boə lə bofo Onanto eto sekakedikɔ eto umə eto əsuə eto sinə. ³ Nya lə bofo kato eto əsuə eto sinə siamfo, yensiembutsyə fe busi leya. ⁴ Nya se bunsɪ lə kasɔ kamfo eto sinə eto dibú kafo, busi boala kawɔnɔ lə bulə əsuə. Nya inni bənkə bola boə lə bɔbɔ lə kasɔ kamfo eto sinə əsuə. Bomu bola boə lə bofo Onanto eto sekakedikɔ eto sinə buti lə əsuə bə lə sinə sia ləənkpə lə sefo nsia ləəkpə eto kɛnyɛ kenke. ⁵ Onanto ni nwə lɛlɔ bo utsyə itə nko eto bofloma bomfo eto bubə. Nya úfi wə Lɛwɔnɔ útə bo fe lesa nə bufi bɔnlɛ kusu bobɛ uyi bose itə asa nnya kenke ólɔ utsyə bo eto bubə. ⁶ Nyamfo eso bonkpe ɔkɔɛ lefe saa nɛ. Nya buyi boənkə lə bokpe lə əsuə eto sinə siamfo əsuə, boanyotɔ Bonamute ɔflɔ nye wə ənəmi. ⁷ Nya nkpə bo bunsɪ mfoo, busi mu lə bofokanɔ əsuə. Nya inni lə lesa nə bo ənəmi kənyə lə bote

ini. ⁸ Bokpe ɔkɔɛ tinti nya enkpe bo ɔkɔɛ enso læ boyani əsuə eto sinə siamfo butsyə læ budufə Bonamute eto ku bo ənəmi bomu. ⁹ Nya lesa nə bɔnlɛ bɔbɛbɛ enso kenke ni bə, bokpe mfo o-o, bokpe læ Onanto eto umə o-o, ele bə buyifo lesa nə luudufə wə ənə. ¹⁰ Itsyise ele bə bomblɛ bɔ lɔ Kristo eto ənəmi bə læ okponko bo lekpo. Nya utsyuə saa loofɔ kayo ka dinyə itə læ nkpə bo usiə læ kawunsiə kamfo. Kase keni o-o, kabua keni o-o, Kristo ebofo wə kayo eyɛ læ nkpə bo úsiə læ kasɔ kamfo kenyɛ.

Bitə Lə Lɔniyifoyifo Lə Ləkə Bo Ku Onanto Nti Eyɛ Lə Kristo Əsuə.

¹¹ Se bunyi boə ele bə bote Bonamute əmə sikipii, eso boakplatsya kefi nya kakpe betidi bamba əsuə bə mə tsya yifo nko. Onanto wə yi kase bunte kenke nya mfo nnɔ miə mi tsya yi bo ditsyəbi taa utu kəmiə. ¹² Inni bənkə busi bɔlɛ bo əsuə bɔtɛsə kate mi, bomu bɔlɛ bokplatsya boə boətə mi læ bebesə əsuə kato læ bo disi eso. Nnla miə binyə kənyənkɔ befo mbuayɛ butə betidi ba leefi əsuə eto dinyəsa kabesə əsuə kato, nya inni bə læ ditsyəbi sɛɛ eso. ¹³ Lə iyifo bətsyuə fe betidi ba disi lebia bunii, nyalɛ itsyi læ keyifo ka boeyifo əsuə eyɛ læ Onanto wə boala eso. Nya læ disi mambia boo, ite nko itə mi lələkɛsə. ¹⁴ Kristo eto lelabi nə onkpe itə bo eyi bo əsuə. Nya se ekpako bo boə utidi ɔni ete díkpə læ betidi ba kenke eto disi esoo, nyamfo lɛ bote bə bomblɛ díkpə. ¹⁵ Kristo əkpə læ betidi ba kenke eto disi bə læ mba nsi nkpə, mensisiə nkpə itə mə əsuə nye mə lelabi. Bomu læ bəsiə nkpə itə Kristo

wə díkrə lə mə disi esoo, wə batakasə betsyiko ɔkɔmə.

¹⁶ Nya lə nyamfo eto kamaa, boensiemfi kawunsia kamfo eto betidi eto kenye kakpronko kuutsyuə lekpo. Ite bə bókpronko Kristo lekpo lə kusu komfo əsuə lə lefe nə léfe mməə, mómɔɔ, boesienyifo nko.

¹⁷ Nyaso lə utsyuə ku Kristo éyifo banii, útə nkə ofiani utidi fɔfɔ. Nya wə utidi eto ditsyəbi koko nəmə ébubə lefe. Nya lɛfɔfɔ ébubə lefo lə ni kenye. ¹⁸ Onanto ni nwə díyifo asa nyamfo kenke. Nya úləkə asa nnya lébiasə bo ku wə nti bə lə buyifo bani ku wə eyə lə Kristo əsuə. Nya wə ke ni nwə dífi keyifo kamfo ókrə bo lə ani nkə lə bunə betidi bamba boboko wə oflɔ lə ɔlɔ mə ku wə nti bafiani bahɔ. ¹⁹ Nya letsyabebe nəmfo ni nkə, Onanto, eyə lə Kristo əsuəə, ólɔ wə ku betidi ba kenke eto nti. Nya úləkə ato lə mə abuayifoyifo kenke əsuə. Nya keyifo ka úfi ókrə bo lə kɔni ni nkə, lə bɔtəyi betidi ba kenke ditiki nə díyifo mə wə bahɔ.

²⁰ Nya bo buni nyə lə Kristo eto kenye. Nya Onanto kosate ni nwə nyə lə bo əsuə ɔnlɛ mi kɔlɛ bɔlɛ. Nyamfo eso bunyə lə Kristo eto kenye bɔnlɛ mi lekpakpa boə bitə lə balɔ mi ku Onanto eto nti.

²¹ Kristo ménnyifo lebua saa. Fɛɛ lə bo disi esoo, Onanto eyifo wə ófo bo abua útsyi, bə lə buyifo bani ku wə, lə bɔfiani mba nyə lə kusu sɛɛ əsuə lə Onanto eto ənəmi.

6

¹ Se ini bonko Onanto nyə bɔnlɛ keyifo esoo, bɔlɛ mi lekpakpa boə mimba díkafo Onanto eto

lefonæ, biambiasæ ni. ² Itsyise Onanto áteyi nkæ,
 “Se lefe léyo bæ nnyæ fæ kaminsæ,
 nno fæ olatoto.

Nya se éyo diyi næ ele bæ mmfo fæ tsyaa,
 nwunsæko fæ.”

Benó! Nlæ mi boteyi minkæ momo ni lefe næ ele
 bæ Onanto nyæ mi kaminsæ nɛ. Nya mmi ni diyi
 næ ele bæ Onanto fo fæ læ nkpæ nɛ.

Paulo Ænyæ Kanyi.

³ Boanla boæ kuutsyuæ saa nyæ kabua læ bo
 keyifo æsuæ. Læ nyaso boanla boæ boeyifo kulesa
 næ luuti kuutsyuæ saa bofokano eto kusu. ⁴ Bomu
 læ lesa saa næ boeyifo æsuæ, boælækæ kate wuee
 boæ Onanto eto beyifoyifo buni. Boányæ kekleke
 læ kusu saa æsuæ, læ bulæ æsuæ ku læ kanyinyanyæ
 æsuæ ku læ ohiã kæmiã. ⁵ Læ báblɛ bo nye bákpe
 bo læ Aba eto diyo nye báyele bo nye búyifo
 keyifo bosonsæ æsuæ nye bóennyæ lefe bolabe
 selabe nye búsiã kukpense tsya.

⁶ Boælækæ kate boæ buyifo Onanto eto beyifoyifo
 eyɛ læ kase boalɛ æsuæ kenke læ kobe ku dibusæ
 ku kafo ekpɛ æsuæ. Nya Onanto eto Lɛwɔnɔ nsi
 ko bo nya boala betidi ku kafo faa. ⁷ Boanwɛ
 betidi læ bo Ditiki Sɛɛ eto letsyabebe æsuæ. Nya
 Onanto eto æsuæale nnya ntækæko bo tsya aate
 nkæ buyifo wæ beyifoyifo. Bo nkpæ sɛɛ siəsiã
 eyifo fe bemamakæ bia boefi kakpɔ lema, kata
 bo æsuæ disi tsya. ⁸ Bætsyuæ ætə bo dibu nya
 bætsyuæ tsya laakpe bo kofani. Bætsyuæ aaka bo
 nya bætsyuæ tsya laatesæ bo. Betidi ænyæ bo
 fe badia, fɛɛ ditiki eto onukuale ni næ boatɛyi.
⁹ Betidi eyifo fe benyi bo, fɛɛ beyi bo kenke.

Fe búkrə, fɛɛ busi nkrə! Bənə bo koto sitinti, tsya bánlo bo. ¹⁰ Ite bə beefi bo fe baminsətidi tsyaa, bələ disuəyuə bunyə lefe saa. Bəənyə bo fe bakombo, fɛɛ boətə betidi laafiani Onanto eto umə eto batabinyə. Bəənyə bo fe betidi ba kulesa lente. Fɛɛ bo bomu lesa saa nte nɛ.

¹¹ Bo bayimi, Korintofó, búdi mi etiki kafa faa nya búmenkli bo akɔəsi faa bítə mi. ¹² Inni bo dímansini bo akɔəsi bítə mi! Mi, bomu, dímansini mi akɔəsi bítə bo. ¹³ Nnɛ mi etiki budi mómó fe kase ubianto leedi wə bebi etiki. Nya fe kase búmenkli bo akɔəsi bófo mii, mi tsya menkli mi akɔəsi bitə bo lə befo bo nko.

Mimba Ni Bafokanɔfo Ku Mamfokanɔfo Eni Bani.

¹⁴ Bebe biə mimba ni bafokanɔfo ku mba ni mamfokanɔfo menyifo bani. Itsyise lesa nə nyɛ lə kusu əsuə ku lesa nə lannye lə kusu əsuə əmbofo bókó keyifo lesa lóni kon. Nko ke diyənde ku ketuntu lembofo bókə lə kalebe kani nɛ. ¹⁵ Kristo ku Obonsam embofo bani buyifo. Nko ini bə nwə léfo óno ku nwə dímamfo óno əmbofo bani buyifo nɛ.

¹⁶ Ntsyə difiəyo ku Lenantoyo lofo bókó kake lə kalebe kani? Nyaso bo tsya mənńyə butə difiəyo, itsyise bo ni Onanto wə leenkpə eto kakenkó nyɛ kəsiəkó. Fe kase Onanto kosate lɛtɛyi nkə, “Muutsyə kəsiəkó lə mə nti nya muusiəko mə, nya moofiani mə Onanto, nya mə tsya loofiani mɔ betidi.” ¹⁷ Nyaso Bonamute lə wə betidi bɔtɛyi nkə,
“Bəbo lə mə nti,

nya biləkə mi əsuə bitsyiko lə betidi ba lətə
 bəfiə kedi nti.
 Bientidi mə asa nnya laanansə əsuə mfó,
 nya moofó mi atuu.
 18 Nya moofiani mi Anto,
 nya mi tsya loofiani mə bebisani ku bebisio.
 Nko Bonamute Əsuəalenyə Kenke lətəyi nɛ.”

7

¹ Mə bayimi lala, se Onanto ditsyə bo nyamfo
 kenke eto kənyə esoo, bitə lə buyifo bo əsuə
 kənke, lə buləkə bo əsuə butsyiko lə lesa saa nə
 loonansə bo əsuə eto sinə ku ləwəno. Nya lə
 buyifo bo əsuə kənke butə Onanto, se boebu wə
 nya boate wə sikpi eso.

*Paulo Ənyə Disuəyua Se Korintofọ Letsyi Mə
 Nkpə Bəwuninsə.*

² Bifi lelabi bitə bo lə mi akəesi. Bóanta
 kuutsyua saa búbu nya bóantafa mi kuutsyua
 saa ku bówe kutsyua saa bókpe. ³ Minlə nyamfo
 bətəyi lə nlo mi dikpi. Itsyise mótəyi mi lə lefe
 ditsyua léfe miə, bóla mi asa sitinti bə lə ukpə
 kəmiə o-o, nkpə kəmiə o-o, kulesa embofo bo nti
 busensə. ⁴ Mmfo mi nno tinti! Nya maaso ləkəesi
 kabesə əsuə kato lə mi disi. Lə mi kanyinyənyə
 əsuə tsyaa, məəmuə utu kale lə disuəyua nə diyi
 mə əsuə kenke lə mi eso!

⁵ Se búsu búdufə Makedonia kulaa tsyaa,
 boənyə lefe butsyə ənwə saa. Bulə kpə etu bo,
 betidi ədiənkə bo lə kalebe saa. Nya betidi
 díkakrənkə bo nya búkate sikpi. ⁶ Fɛɛ Onanto
 wə laamansə betidi ba nlə nku buwi ku nkuənlo
 ləkə, ákpe bo nkəale se Tito ditsyi mi əflo úbə

údufə. ⁷ Nya inni wə bubə mate ete dítə bə búnyə disuəyuə. Bomu óteyi bo kase békpe wə otsyekle nya lekε wə ɔkɔε nya óteyi kase béla keklege biə biənyə mε lə befo mε kafo faa, ku kase ílə mi itə mε lə nnya díbə əsuə ku kase bínyə mə kama keklege lə beta mε disi. Nyamfo eso minsi mínnyə disuəyuə tinti minso nε.

⁸ Kukue ko míwɔni míntə mii, álo mi ani tinti. Fεε yenle mε bə nwɔni ko ntə mi. Ite bə kukue ko míntsyese mi álo mi ani tsyaa, álo mi ani itə lefe kliminti ete. Tutεε, ílə mε, ⁹ fεε mɔmɔɔ, nle disuəyuə bunyə. Inni nnya ani lélo mi eso, bomu bə ítə bə mi lehua nə bíyifo éfi mi nya betsyi bəwuninsə lə nnya eso. Se bínyə kanyi fe kase Onanto lélaa, nyaso bóenyifo mi kabua saa lə nnya əsuə. ¹⁰ Nya lə utsyuə ənyə kanyi fe kase Onanto laalaa, wəənyə bɔtsyi kawuninsə nya baafo wə lə nkpə, itə yensiənlə wə. Fεε lə utsyuə əənyə kanyi lə kawunsiə eto bola əsuəə, ukpə hā wuunyə utə wə əsuə. ¹¹ Bebe kase kanyi kamfo eto okle ka Onanto lebebe útə mi nle keyifo lə mi əsuə. Itə biakplatsya keklege keyifo asa kələkə əsuə ketsyiko lə lebuayifoyifo əsuə, kəsia nkpə sεε. Itə biantɔnɔko asa nnya ləmbə kɔnɔ eto buyifo nya itə biate sikpi. Itə biabe kusu itə asa nnya luubə nya biankpe otsyekle lə asabuyifo əsuə ku itə biala biə bənə nwə leeyifo kabua koto. Lə asa nnya kenke əsuə, bíləkə bete fe mba nyε lə kusu əsuə, ba kabua saa ləmbə lə əsuə lə etiki nyamə əsuə.

¹² Nya ite bə íwɔni kukue komfo ntsyese mi tsyaa, ini lə nwə díyifo kabua nye nwə báta bébu eso. Bomu íwɔni ko miə lə Onanto eto

ənəmii, nləkə nte mi kase dibu biətə bo mfui tinti. ¹³ Nyamfo kenke lékpe bo nkəale nɛ.

Inni bə ékpe bo nkəale ete, bomu lə kase Tito lékpe bo disuəyuə ku wə disuəyuə nə únyə ku kase bəwunsə békpe wə anyo eso. Itsyise mimble ətə bə wə nsusu əsiə kaso buɛɛ. ¹⁴ Bíəntə ndi kofani lə wə ənəmi se mímbesə əsuə kato lə mi disi eso. Nya lə kase lesa saa nə bóteyi mi eyifo onukualeɛ, nyaso kase bóso lekɔəsi lə mi əsuə bítə Tito tsyaa, əbə itə itsyise eyɛ lə kusu əsuə. ¹⁵ Nyaso wə lelabi itə aabe kakanwu lə okloma kase bítsyue wə asatete koto ku kase bəfo wə lə əsuə kaso bobokosə ku dibu əsuə eso. ¹⁶ Iyifo mɛ disuəyuə bə mofo mi bofo kano lə kusu saa əsuə.

8

Bitə Betidi Asa Kafo Faa.

¹ Mə bayimi, bola boə bete asa nnya Onanto díyifo útə bafokanɔfo eto etsyukpa nnya kenke nkpe lə Makedonia eyɛ lə wə lefonə əsuə. ² Bédufə lə boto kabe kekleke əsuə eyɛ lə bulə bo dítu mə əsuə eso. Fɛɛ lə nyamfo kenke kamaa, bənyə disuəyuə tinti nya bəyifo kafo ekpe bətə betidi asa kpə ku kafo faa, ite bə beyifo bakombo tinti kulaa tsya fɛ. ³ Mofo bóteyi miə bətə betidi asa fe kase bofo. Nya nɛ mi bóteyi lə onukuale əsuə minkə, bətə asa básonsə kase inte mə kulaa tsya lə mə kosate eto lelabi faa əsuə. Lə mə kosate eto kafo faa əsuə, ⁴ bále boo lekprakpa sitinti bə lə butə mə kusu lə bawunsəko betidi ba leeyifo Onanto eto keyifo lə Yudea eto kaso əsuə. ⁵ Nya asa nnya bəyifo mfóo, so kase bo

kosate lébe kusu boə bátafo buyifo! Tutεε, béfi mə əsuə bətə Bonamute nya lə nnya kamaa, lə Onanto eto lelabi əsuə, báyani mə əsuə bətə bo tsya.

⁶ Lə nyamfo esoo, bótɛyi Tito wə dítsyə keyifo kamfo kasɔ lə mi nti boə, úsukosə lə ɔwunsəko mi lə belosə lelabi eto keyifo kamfo. ⁷ Məmɔɔ, bíusu sɛtɔ lə lesa saa nə nkpe mi əsuə. Sitintii, bíusu sɛtɔ lə mi bofokanɔ ku etikididi ku ko-betete ku otsyekle kpekpe ku kase biala bo tsya əsuə. Nyaso bola boə bekpe nkεale lə bisu sɛtɔ lə mi lelabi faa eto asatətə nyamfo əsuə nko tsya.

⁸ Inni kɔfi minlɛ mi bokpe, bomu mfi lek-platsya nə betidi bamba nɛɛ, bufi kakatesə ko mi lele lə mbe lə mi ditidila tsya eyifo lelabi tinti. ⁹ Itsyise biyi kase Bonamute Yesu Kristo dífi lefonə útə mi. Nya ite bə otabinyə uni tsyaa, úyifo wə əsuə okombo lə mi disi eso bə lə ɛyɛ lə wə sekombo əsuəə, uyifo mi batabinyə.

¹⁰ Nsusu bo muutə mi ni bənkə yɔɔleke bə belosə məmɔɔ, keyifo ka bítsyə kasɔ leleko. Mi ni betute ba dítsyə kasɔ nyamfo buyifo nya bini betidi tutɛ kulaa tsya lə nsusu bomfo eto bufi əsuə. ¹¹ Nya fe kase bífi lelabi bítsyə keyifo kamfo kasɔ, bisukosə ke sɛtɔ fe kase ini mi kosate dífi nnya buyifo eto nsusu bomə. Nya bífi lesa nə nte mi biyifo ke belosə. ¹² Lə iyifo mi lelabi kekɛke biə biətə betidi asaa, Onanto ebofo lesa nə nte mi biə biətə. Nya inni lə lesa nə lente mi əsuə.

¹³⁻¹⁴ Inni bótɛyi minlɛ miə meeyifo lə itə betidi bamba eto bitsyikə lə biyifo fomflo, lə nyifo mi bele lə bɛkɛ kalende, fɛɛ se asa kpə nte mi məmɔ

esoo, ɛlɛkɛ bə bɛwunsəko mba inte. Nya lefe nə ehiã mi fɛ kpə nte mə tsyaa, bɔɔwunsəko mi. Lə ibə nkoo, ete bɛwunsəko bətsyuə lə kase inyə itə nɛ. ¹⁵ Nko seka bəwɔni bákpe lə Awɔnisa Kenkɛ eto Kukue nɛ bənkə, “Nwə dínyə bikə kpəə, mənnyə kpə osonə nya nwə dínyə sɛkɛɛ, klolesa máhiã wə.”

Bátsyese Tito Ku Wə Bayetsyuə Korinto.

¹⁶ Boasɔ Onanto ani, itsyise útə ənəmi áɛ Tito nkə lə ɔwunsəko mi fɛ kase bola boə boawunsəko mi. ¹⁷ Se bóto butsyiko wə ɔflo boə ubə ɔwunsəko mii, ótɔnɔ itsyise iyifo wə lelabi nko, nkə lə ubə ɔwunsə, inni lə kase bóto wə eso, bomu iyifo wə lelabi nko, nkə lə ubə mi ɔflo. ¹⁸ Nya kamaa, bɔlɛ Tito ku ɔyimisani wə nkpe dibu lə bafokanɔfo kenke nti botsyese mi lə kase woedi etiki kesensə Ditiki Sɛɛ nəmə eso. ¹⁹ Lə nnya kamaa, uyifo utidi wə bafokanɔfo eto etsyukpa díləkə bə utəkəko bo lə ubə ɔwunsə lə lelabi eto əsuəbufikətə eto keyifo ka boeyifo kefi atesə kətə Bonamute lə bufi bote tsya bənkə iyifo bo lelabi boə boawunsəko bətsyuə.

²⁰ Bɔlɛ bo əsuə kukɔnɔ nya boalɛ ola kukɔnɔ ətəsa asa nnya betidi díta bo ku kafo faa mfó tsya, le kase kuutsyuə saa lembubə okpe kənə ku bo lə kase bɔnlɛ atabi nyamə buyifoko əsuə.

²¹ Itsyise inni lə Bonamute eto ənəmi mate ete bola boə boeyifo lesa nə lɛlɛkɛ, bomu lə betidi kenke eto ənəmi tsya.

²² Nyamfo esoo, búfi bo ɔyimi əmfɔ bóko ku mə bótsyese mi nɛ. Bóto wə bóbe kpə búnyə boə bófo wə bóno nya buyi wə bə okpe otsyekle

tinti. Nya se ófo mi óno nko esoo, iyifo wə lelabi keklege nkə woawunsəko mi. ²³ Nya itsyi lə Tito əsuə, uyifo mo ɔyetsyuə keklege wə leeyifo keyifo ku mɛ kefi kawumsəko mi. Nya bayimi fɛfɛ ba nyɛ ku wə, ni bafokanɔfo eto etsyukpa eto bənyesiə. Nya beefi dibu kətə Kristo. ²⁴ Nyaso biləkə mi lelabi bete mə lə bafokanɔfo fɛfɛ kenke lə bənyə lə bate sitinti bə, ɔnukuale ini bə nyamfo eso boabesə əsuə kato lə mə disi nɛ.

9

Bɔwunsəko Butə Kristofọ Bamba.

¹ Nyə miə yanle bə nsi nwɔni kukue ntə mi itsyi lə bɔwunsəko bo ele bə butə Onanto eto bafokanɔfo lə Yudea eto kasɔ. ² Nyi minkə iyifo mi lelabi biə biawunsəko betidi bamfó. Nya maaso lekɔesi lə mi disi lə nyamfo əsuə lefe saa kate bafokanɔfo nkpe lə Makedonia. Nteyi mə minkə bayimi ba nkpe lə Akaia eto kasɔ, əmuə əsuə bətsyə taa lələko bə buutə bɔwunsəko bomfo. Nya itsyi lə mi ute bokpe lə nnya əsuə, nya ləsanklisə mə nti betidi kpə nɛ. ³ Nya mɔmɔ, nɛ bayimi bamfo botsyese mi bə lə bənyə bə bo əsuə katobesəbesə lə mi disii, eni bimba. Nya fe kase maateyi mə lefe saa, nla miə biumuə əsuə bitsyə ku mi bɔwunsəko. ⁴ Nya lə nnya ete bayimi ba nkpe lə Makedonia bətsyuə dítəkəko mɛ bəbə mi ɔflo nya bəbə bənyə bə bíəmmuə əsuə bítsyə fe kase mínteyii, bo ku mi ta eto ənəmi ebokpoo kasɔ sitinti, tsya fɛɛ mi kole eboso le kase bufi ənəmi butəkə lə mi əsuə eso. ⁵ Nyamfo eso mímbu miə efe bə ntsyese

bayimi bamfo mi ntɔnsə nɛ. Be lə bawunsəko mi bɛbɛ ətəsə nnya bɛtɛyi biə biutə bitsyə fɛ lə mbə ndufə. Nyamfo loote bə mi kətə kamə eyifo lesa nə bítə ku kafo faa. Inni bə kuutsyuə lenyinkə mi ókpe eso bɛnlɛ asa nyamə butə.

Onanto Aala Utidi Wə Ləətə Lesa Ku Kafo Faa.

⁶ Bekloma biə utidi wə laato asa sɛkɛɛ, sɛkɛ ete wuufəsə. Nya nwə laato asa kpəə, nko ke wuufəsə asa kpə tsya nɛ. ⁷ Nyaso mi utsyuə saa tə lesa nə wə kosate léla nkə wəətə kafo faa. Nya inni ku kanyinyənyə nye iyifo fe kuutsyuə nýə kuutsyuə lə əsuə fɛ útə nnya. Itsyise Onanto aala nwə ləətə lesa ku disuəyuə. ⁸ Nya Onanto ebofo fə lesa saa butə enso kase lehiã fə. Itə bə lə lefe saa əbəkɛ kpə nya fofo keyifo sɛɛ saa buyifo ku nnya. ⁹ Awɔnisa Kɛnkɛ eto Kukue átɛyi itsyi lə utidi əmfo eto okle əsuə nkə,

“Wə ləətə betidi ba ni bakombo asa ku kafo faa, nya wə kafoɛkpɛ te lefe saa.”

¹⁰ Onanto wə ləətə ɔkuəmfo eyibibi nkə oto nya woənyə didisa kedii, ebutə fə eyibibi nnya kenke lefe itə fə. Nya wuutə yoobe itə fə didisa kpə itsyi lə fə lefonə eto keyifo itə betidi kpə eso. ¹¹ Wuutə nkə asa kpə kɛ fə lefe saa bə lə ekeyifo kafoɛkpɛ, bə betidi kpə ebɔsɔ Onanto ani ɛyɛ lə fə ətəsə nnya baafɔ kayɛnko lə bo əsuə eso.

¹² Itsyise bɔwunsəko bo biətəə, aawunsəko Onanto eto betidi. Fɛɛ isi ensoo, yəətə Onanto leninsɔ kpə lefe saa. ¹³ Nya lə bɔwunsəko bomfo eto nnya laabɔ ketsyiko lə nnya əsuəə, betidi kpə ebufi atəsə bətə Onanto lə bofokanɔ nkpe mi lə Kristo eto Ditiki Sɛɛ nə bəfo bɛnɔ, ku mi kafoɛkpɛ

ka bifi bitə mə ku utsyuə saa. ¹⁴ Nya lə lelabi kplə əsuə, mə eboto ola lə mi disi lə lefonə kpə nə Onanto ditə mi eso. ¹⁵ Bitə bəso Onanto ani lə wə ditəsa nə boebofo bətəyi nə úfi útə bo eso.

10

Paulo Áta Disi Keyifo Ka Weeyifo.

¹ Mə, Paulo, kosate éfi Kristo eto əsuə kasə bokosə bokosə ku əsuə buyuəsə nle mi kələ bələ ku lekprakpalələ miə mə nwə laabokosə əsuə kasə lə mi ənəmi fə meeyifo asa ku utu lə mimbə mi lə oflō uni. ² Lekprakpa minlə mi bə lə mbə mi oflō, biəntə bə etiki kumi ku mi lə senyanya əsuə. Fəe mi nti eto bətsyuə ba leebu bənkə kawunsiə kamfo eto kobe əsuə ete boeyifo bo asa kayenkoo, muunyənki nkpe mə. ³ Sitinti ini bə bokpə lə kawunsiə kamfo, fəe inni kase kawunsiə kamfo laakpə lema bənlə bəkpə. ⁴ Itsyise bemakə bia boefi kakpə lemaa, mentsyi kawunsiə kamfo. Bomu Onanto eto əsuəale nnya nkpe ale boefi katsylōsə balo bamə eto nyanke kekleke bomə. ⁵ Boatsylōsə bidia, bidia eto etikinənə ku lesa saa nə befi kataka kənyə nnya leeti betidi kusu bə bate Onanto. Nya boəmuə nsusu saa fe betidi ba lema lekpə boə butsyue Kristo koto. ⁶ Nya lefe nə bunyə buə beyani mi əsuə kenke bitə Kristo eto ditikii, buunə koto utsyuə saa ke dímentsyuə wə kotoo.

⁷ Asa nnya ni ənəmi ənəmi eto asa hā ete bənlə bobə. Lə mi utsyuə áfo óno nkə uyifo Kristo eto olee, okloma nkə fe kase wuuntsya ni Kristo eto olee, nko ke bo tsya nyanke butə Kristo nē. ⁸ Nya lə nsə lekəesi mbesə əsuə kato enso kase ele

bə nyifo lə əsuəale nnya Bonamute dífi útə bo nkə bufi bunə mi lə bebe lə wə bofokanɔ əsuəə, nya inni bə lə bufi bunə mi bobokosə kamaa, kofani embɔlɛ mɛ lə nnya əsuə. ⁹ Məmbola miə bibu biə sikpi minlɛ mi bokpe ɛyɛ lə ekue nnya maawɔni kətə mi əsuə. ¹⁰ Lə mi ntii, utsyuə ebɔtɛyi nkə, “Paulo eto ekue nya waawɔni kətə mi eto kɛnyɛ kpe ale ku əsuəale tinti. Fɛɛ lə okpe lə bo ɔflɔɔ, uyuə nya wə etiki əmbə kasɔnɔnɔ saa.” ¹¹ Nla miə utidi emfo eto okle te nkə, asa nnya boawɔni katsyese mi lə ekue əsuə ku nnya boeyifo lə bokpe mi lə ɔflɔɔ, letetekɛke saa əmbə lə nnya nti.

¹² Imbə bo ɔkɔɛ kon tsya boə boefi əsuə bokatesəko betidi ba diyifo fe mba leebu bə bakplenyə beni. Beyifo mba leeninə. Beefi mə əsuə kakatesəko mə betsyuə lə mə asayifoyifo əsuə nya mə kosate ditsyə nnya beefi əsuə kakatesəko. ¹³ Fɛɛ boɔ, bo əsuə katobesəbesə əmboso kase inyə itə. Nya boombesə əsuə kato boso keyifo ka Onanto dítə bo nya nka bɔnlɛ buyifo lə mi nti tsyaa, nkpe lə nti.

¹⁴ Nya se mi tsya nkpe lə kaka Onanto dítə bo nkə buyifo ke bɔse esoo, bóenyifo ke bɔyilasə ke kasekɔ. Itsyise bo ni mba ditsyiko mi ɔflɔ bubə ku Kristo eto Ditiki Sɛɛ nəmə. ¹⁵ Nyaso boambesə əsuə kato kayila betidi bamba eto keyifo ka bɛyifo itsyise kaso nka Onanto dítə bo. Bomu bo kusubebe təkə lə mi bofokanɔ eto katobebe əsuə nya lə bofo asa buyifo kaso nko lə mi nti le kase Onanto dítə bo nkə buyifo. ¹⁶ Lə nnya kamaa, bofo Ditiki Sɛɛ nəmə bɔtɛyi lə nlebe bo kuutsyuə dímanyɛtɔ óyo tsya. Nya yembudi

bə bələ əsuə kato bobesə lə keyifo ka betidi bamba díyifo əsuə. ¹⁷ Nko seka báwəni bákpe lə Awənisə Kənkə eto Kukue əsuə bə, “Nwə ke laala nkə woabesə əsuə kato, ele bə obesə əsuə kato lə lesa nə Bonamute díyifo əsuə.” ¹⁸ Itsyise inni utidi wə laatesə wə əsuə ni utidi sɛɛ, bomu nwə Onanto laatesə.

11

Məntə Lə Olontidi Obonsam Lə Obiasə Fə Nsusu.

¹ Nla miə lə asini ani afo mɛ ku kafo faa, lə nyifo fe nwə leeninə kulaa tsya. Nlɛ fə lekpakpa, fo nnya ətə mɛ nko ete. ² Maakpə kutsyuəsɛ lə mi disi fe kase Onanto leeyifo lə mi disi. Ntə mi disi ntə Kristo hā fe kase baatə kebitɛ ka lenyitə osani disi kətə kusə. ³ Fɛɛ nlɛ sikpi bote miə Obonsam ebobiasə mi nsusu bə biembudi ɔnukualɛ bitə Kristo mate, bisumu wə fe kase bíkeyifo. Nko íbə bə owa əmə efi wə kawəsə obiasə Eva eto nsusu nɛ. ⁴ Nlɛ mi nyamfo bətɛyi nko itsyise biatəɔ mlə kafo utidi saa wə ləəbə katɛyi mi ditiki bamba nə ləbɔ lete itsyilə lə Yesu wə əsuə bobɛ letsya butə mi. Nya biafo ləwəɔɔ ku ditiki nə ləbɔ lete lə Onanto eto Ləwəɔɔ ku bo Ditiki Sɛɛ nəmə əsuə kanə.

⁵ Fɛɛ mfo ɲnə miə məmbə kasə nso betidi bamfó ba bieminkli ani kafo ku kafo faa fe mba diyifo batənkpe sɛɛ banso mba bətsyese sitinti. ⁶ Lə maamfo etiki budi kukəɔ tsyaa, inni lə Onanto eto Ditiki Sɛɛ əsuə minyi. Lə ɔnukualɛ əsuəə, bítə bɛnə nyamfo kasə wuee lə kusu saa kusu əsuə.

⁷ Lefe nà mímbé Ditiki Σεε nàmə letsya míntə mii, mámfó mi kulesa fe kayofofo seka. Bomu mbokosə mə əsuə kasə ntə mi bə lə ebesə mi kato. Nyaale se mínyifo nyamfo nko esoo, kabua keni mínyifo? ⁸ Lefe nà mínkə mfo keyifo keyifo lə mi nti, etsyukpa bamba díkafo mə kayo, boofó bətəyi bə nkeyu mə bə lə mfi nwunsə ko mi.

⁹ Lefe nà mínkə lə mi nti mínkabe mə əsuəə, mənłə mi itə bəwunsəko se atabi lehiā mə. Bayimi ba ditsyi Makedonia dikawunsəko mə lə lesa saa əsuə. Nya mémfi bulə saa ntəkə mi lə əsuə nya membufi bulə saa tsya mbə nkətəkə mi lə əsuə kulefe. ¹⁰ Se Kristo eto ɔnukualətiki nkpe lə mə esoo, nle bokakase miə kuutsyuə saa embofo mə kusu buti lə ləkəsəsi nə maaso lə ditiki nəmfo əsuə lə Akaia eto kasə lə kalebe saa. ¹¹ Bətəyi minle nyamfo nko se manla mi eso lee? Onanto kosate yi nkə maala mi. ¹² Muusukosə keyifo ka minle buyifo nya membofo kulesa intsyiko miə ɔflo. Nya luutə bə mba nle mə əsuə bokpo bə batənkpe beni kabesə əsuə kato, baye kusu bunyə katəyi bənkə keyifo ka banle akateko nka bənlə.

¹³ Betidi bamfó eni batənkpe kosate. Baawə betidi katəyi bidia lə mə keyifo əsuə. Beeyifo mə əsuə bə lə betidi lə bənyə mə fe Kristo eto batənkpe kosate beni. ¹⁴ Nya nyamfo menyifo lesa fəfə, itsyise Obonsam aafó əsuə bofloma keyifo fe kato eto ɔtənkpe wə ləəyənde. ¹⁵ Nyaso nyamfo menyifo bo naa bə mba ntəkəko wə aatsyi mə əsuə kawuninsə keyifo fe basee ba leeyifo Onanto eto keyifo. Fεε lə kalosəkəɔ, boonyə nnya kayofofo fe kase ińyə itə.

Paulo Ábesə Ɔsuə Kato Lə Asa Nnya Úlakə Óte Ɔsuə.

¹⁶ Nsi nle bŃteyi miə, kuutsyuə saa membu nkə meeninə. Fɛɛ lə utsyuə eebu nkoo, bifi nnya nko bitə mɛ bə moofo əsuə kato bobesə sɛkɛ ete eso. ¹⁷ Nya lesa nə minle bŃteyi mfoo, eni lesa nə Bonamute loola nkə nteyi. Fɛɛ əsuə kato bobesə eto ditiki nə minle bŃteyi mfo, eyifo fe kase nwə leeninə laabesə əsuə kato kedi ebukitiki. ¹⁸ Fɛɛ se betidi kpə leefi kawunsiə kamfo eto asa kabesə əsuə kato esoo, bitə lə mintsya lə mbesə əsuə kato sɛkɛ. ¹⁹ Se mi kosate diyifo babesibe nko esoo, nyaso bitsyəsuaəko mba leeninə lə disuəyuə əsuə. ²⁰ Biakɛ lefe kulaa tsya kətə lə utsyuə efi mi uyifo wə odomunyə nye díyifo mi lesafimfi, nye otafa mi nye woənyə mi lə kulesa əsuə nye ɔsɔ mi lə kotosi kulaa tsya. ²¹ Fɛɛ boo, iyifo bo kofani bə bóenyifo mi nyamfo eto okle. Lee bíbu biə eni búyifo nko?

Fɛɛ lə utsyuə ebofo utu bokpe kabesə əsuə kato lə lesatsyuə əsuəə, nle etiki budu fe nwə leeninə lo, nyalɛɛ, mintsya ebofo utu bokpe nko seka, mbesə əsuə kato. ²² BŃteyi banle bə Hebrifo benii lee? Mintsya mə mini nɛ. BŃteyi banle bə IsraelfŃ beni lee? Mintsya mə mini nɛ. BŃteyi banle bə Abraham eto kafo eto bebi beni tsya lee? Mintsya mə mini nɛ. ²³ Kristo eto beyifoyifo beni lee? Nle etiki budi fenkə nwə disi lebia, fɛɛ etiki eto ɔnukualɛ ni nleke nso mə. Nyifo keyifo kekleke nso mə, bakpe mɛ lə Aba eto diyo sesia sesia baso mə. Bable mɛ tsya sesia sesia baso mə. Nya minke lə ukpə ku mənkpə eto nti sesia sesia. ²⁴ Sɛnɔ sŃŃ YudafŃ leble mɛ awosi ətsyə

sɛwɔnɔmbə ku ukue fiofio. ²⁵ Nya Romafɔ lɛblɛ mɛ ku lekete sityə. Bato mɛ aba soni. Nsiə lə ɔklo sityə nya séba ku mɛ nya mindufə lə lekpo eto ntu əsuə. Nya lefe lonii, nke lə ntu ketsye kani ku diyi wɔlɔlɔ.

²⁶ Sesia sesia sesia sia minye kusuu, ndufə lə bulə akpa akpa əsuə. Lə mɔ kusu bɔye kpə kəmiə, ndufə lə ketuyiyi ku beyu eto ani. Meedufə lə bulə kəmiə lə mɔ betidi Yudafɔ kosate ku mba lenni Yudafɔ tsya eto ani. Meedufə lə bulə əsuə lə kəmə nkplɛ eto betidi eto ani ku lə ntenti. Ndufə lə bulə lə lekpo əsuə ku bayimi ba ni bayimi ba ni badia eto ani. ²⁷ Nkplatsya nyifo keyifo kekleke. Mánke lefe nlabe selabe ntsye kpə. Məsiə kukpense nya utukəe laale mɛ, nya lefe kpə maanke lesa kedi kemi. Lɛyɔ aale mɛ, nya məənyə kulesa nə muufi nti əsuə. ²⁸ Nya ekɔ ku nyamfo kenkee, maanke lefe kala kəsiə itsyi lə kase məsiə kebu disilə bafokanɔfɔ eto etsyukpa kpə nnya nkpe lə nlebe nlebe eto lələkəsə əsuə eso. ²⁹ Lə utsyuə əbə kama lə wə bofokanɔ əsuəə, yəətə bə ani aalo mintsya. Nya lə bətə utsyuə edufə lə lebuə əsuəə, yəələ mɛ lə utu.

³⁰ Lə ele bə mbesə əsuə kato, yuutsyi lə kase minyɔkpɔ eso. ³¹ Onanto wə ni Bonamute Yesu eto Anto, wə ni nwə boatɛɛ lefe saa, wə ni nwə nyi sitinti nkə asa nnya minlə bətɛyi mfoo, minlə sídia bətɛyi. ³² Lefe nə minke lə Damasko, Aba eto Unyɛsiə ninə wə ləke lə Oka Areta kalɔ, ala nkə lə umuə mɛ. Lə nyaso unyənsə mba laase asa lə ofati wə bato batsyilama umə əmə eto mbosie nkə lə bəmuə mɛ. ³³ Fɛɛ befi mɛ bakpe

lè ditsyitsya bayenko ku ukua eye lè ofo wè nkpe lè ofati àmè babokosè kasò òbò òttsyetsyi òdu lè wè oflò.

12

¹ Ele bə nso lekɔɛsi mbesə əsuə kato ite bə kutəkə saa əmbə lə nnya əsuə. Fɛɛ muudi etiki itsyi lə asa nnya minyə ku asa nnya Bonamute dítə mɛ ku nnya úləkə ótə mɛ əsuə. ² Nyi osani utsyuə wə ni Kristonyə wə Bonamute lékpa usuko kato alɛ lefosi ana ni nnya léfe mmə. Fɛɛ mante lə əsuə eto sinə əsuə dítysi wə usuko kato lee, lə lɛwɔnɔ mate əsuə ókpa wə usuko kato fanlo fanlo Onanto hā ete nyi. ³⁻⁴ Nnya hā minyi ni nkə Onanto ni nwə dítysi utidi əmfo úsuko Paradiso kato mfó. Fɛɛ nɛ mi bɔtɛyi minkə minyi lə əsuə eto sinə əsuə útsyi wə úsuko lee, lə lɛwɔnɔ əsuə fe buləkə kate əsuə seka. Onanto tsya hā ete nyi. Nya mfó, ɔnɔ asa nnya bəntə kusu bə ɔtɛyi nya boəmbofo nnya kasò buləkə kate tsya. ⁵ Nyaso moobesə əsuə kato lə osani əmfo əsuə. Fɛɛ mebosə əsuə kato lə mɔ kosate əsuə, enso asa nnya dítysi lə mɔ bɔyɔkpɔ əsuə hā ete. ⁶ Lə òla kulaa tsya miə maabesə əsuə kato, membuninə nyifo nko. Itsyise ɔnɔkualɛ eto ditiki ni nə muudi. Fɛɛ memuyifo nko, itsyise manla miə kuutsyuə nyə mɛ utidi bamba enso nwə mini lə asa nnya úkənyə mín-yifo ku nnya mɛntɛyi eso.

⁷ Fɛɛ lə itə bə lə nyɛ mɔ əsuə kato bobesə lə asa kpə nnya Onanto díləkə ótə mɛ əsuə esoo, útə nkə nyə əsuə eto sinə eto kanyi. Kanyinyənyə kamfo te fe Obonsam eto ɔtɔnkpe utsyuə wə nɛ

mε bɔblɛ kekɛɛle nya yɔtɔ maayɛ ɛsuɛ kato bobesɛ. ⁸ Nto ola nkpadɛ Bonamute sɛtsyɛ sɔɔ lɛ nyamfo ɛsuɛ bɛ lɛ otakasɛ mε nnya lɛ ɛsuɛ. ⁹ Bomu ɔtɛyi mε nkɛ, “Mɔ lefonɛ ni lesa nɛ hɔ lehɛ itɛ fɛ, itsyise mɛɛlɛkɛ mɔ ɛsuɛale kate lɛ asa nnya meeyifo kɛtɛ betidi ba lɛmbɛ ɛsuɛale saa enso.” Lɛ nyamfo esoo, mɛɛnyɛ disuɛyua kaso lɛ mɔ bɔyɔkpɔ ɛsuɛ itɛ lɛ Kristo eto ɛsuɛale lɛ lefo disɛ lɛ mε kenke. ¹⁰ Lɛ Kristo eto disɛ esoo, ɛɛɛɛ itɛ mε bɛ nyɔkpɔ ku betidi aka mε ku nɛ kanyi bunyɛ ku lɛ betidi ati mε kama ku lɛ asa anɛ bɔtsyɔ kukɔknɔ kɛtɛ mε. Itsyise lefe nɛ ɛsuɛale lelo mε lɛ ɛsuɛ, nya mɛɛnyɛ ɛsuɛale bamba nɛ.

Bafokanɔfɔ Lɛ Korinto Eto Ditsyɛbi Ɛlɛ Paulo.

¹¹ Meedi etiki fe nwɛ leeninɛ seka, fɛɛ mi diɛ ɛbɛ nko. Itsyise mi ni mba ele bɛ eni bɛtesɛ mε fɛ. Lɛ ɛbɛ bɛ manle kulesa kulaa tsyaa, batɔnkpe kpaa bamfɔ manɛke baso mε kon. ¹² Ayanisa ku ɛkpɛnsa kpɛ nnya mɛnyifo lɛ dibusɛ ɛsuɛ lɛ mi ntii, ɛse uyi sitinti nkɛ ɔtɔnkpe kpa mini. ¹³ Mɛnyɛ kulesa nɛ mɛnyifo mɛntɛ bafokanɔfɔ eto ɛtsyukpa bamba ɛnsɔ mi, enso bɛ mɛmfo kulesa ntsyiko mi ɔflɔ bɛ nyifo mi bitsyikɛ lee. Nyalɛ nɛ mi lekpakpa miɛ bifi bɛtsyɛ mε bɛ mɛnyifo nko!

¹⁴ Ditsyɛfɛ ni nɛmfo se mɛmuɛ ɛsuɛ minɛ mi ɔflɔ bubɛ nɛ, tsyɛ memohɛ bɔwunsɛko saa ntsyiko mi ɔflɔ. Mi kosate minhiɛ, inni mi atabi. Itsyise inni bekpefi ele bɛ bɛmuɛ ɛsuɛ bɛtsyɛ lɛ befi babe mɛ antomɛ. Bomu antomɛ ni mba ele bɛ bɛmuɛ ɛsuɛ bɛtsyɛ lɛ befi babe mɛ bebi.

15 Yuuyifo mɛ disuəyua bə muufi lesa nə nte mɛ ku mɔ əsuə kulaa tsya nwunsəko mi. Nya se maala mi sɔɔ nko esoo, beso ele bə mi lelabi itə mɛ bə kaso bomu nko?

16 Biɔtɔnɔ ku mɛ biə, məmbə mfiani bitsyikə ntə mi. Fɛɛ utsyua ebɔteyi nkə nyenko mi lə kɔwɛbe eto kusu əsuə nnyə kutəkə lə mi əsuə.

17 Lee, nyɛ lə betidi ba mɪnkpe mi eto utsyua əsuə ntafa mi? 18 Nlɛ Tito lekprakpa nya mɪkpe wə ku bo ɔyimisani bamba ɔni tsya miə bəbə mi ɔflo. Nya bɔteyi bənle biə Tito áyɛ lə kusu kutsyua əsuə ótafa mi lee? Inni nsusu bɔni ete nkpe bonko wə búfi búyifo nnya? Nya inni kusu kɔni ete bóyɛ?

19 Bubu bənle lefe nəmfó kenke biə bo əsuə eto disi ete bɔnlɛ bota lə mi ənəmi? Owo lo! Bɔle mi etiki budinko fe kase Kristo lela nkə budi lə Onanto eto ənəmi. Balala, lesa saa nə bóteyi mii, nnya ete ni bənkə lə bɔwunsəko mi lə mi bofokanɔ lə bumua ale boso. 20 Nlɛ sikpi bote miə lə mbə mfóo, ətsyua ditsyəbi nə əsuə muubənyə mii, ebɔbɔ lete lə nɛ əsuə moola miə məənyə mi. Nko ke ini bə mi tsya ebunyə mɛ fe mfloma lə kase biola biə biənyə mɛ. Nlɛ sikpi bote miə muubənyə miə bɛle ndiə, kasesə ənəmiə kekkeke nya lefonyi lokke lə mi nti nya biola biə elɛkɛ itə mi hã ete ku bikakpadi bətsyua aye bua kedi bətsyua ketikima ku bikabesə əsuə kato nya kabakəfə luudufə mi lenti lə lesa saa əsuə. 21 Nlɛ sikpi bote miə lə nsi mbə mfóo, ani ebolo mɛ lə Onanto eto ənəmi. Nya muuwi keku lə betidi kpə eto disi, itsyise bantsyi bawuninsə lə mə ketu bənyə kanyi lə asa bua nnya béyifo lə

lefe nà léfe mmə eso. Asa nnya béyifo bábiasə mə əsuə ini, akɔensa ku disənkpo ku disiəkpɔ ku nkpə bua busiə.

13

Paulo Ále Korintofọ Kɔle Ku Kəsia Fefe.

¹ Ditsyəfə ni nəmfo se minlə mi ɔflɔ bubə nɛ. Bawɔni bákpe lə Awɔnisa Kɛnkɛ eto Kukue əsuə bənkə, “Lə befi etiki lə utidi əsuə, ele bə bənyə badansiɛ inuə nye itsyə lə etiki nyamə əsuə fɛ lə balo wə dikpi.” ² Se mímbə mi ɔflɔ dinuəfə, nnkə mba díyifo abua kɔ ku babamba saa ato. Mómɔɔ, minsibə mi lə ɔflɔ mfó, nya nsi nle mə ato bukə bio, bɔtɛyi minlə miə lə nsi mbə mi ɔflɔ, məmbɔni mba kenke diyifo asa bua koto bunə. ³ Nyamfo ebuyifo uyibose itə mi se bela biə biate biə Kristo eedi etiki ɛyɛ lə mɛ əsuə. Wəənyuəsə əsuə lə nnya weeyifo ku mi kulaa, bomu wəələkə wə əsuəale kate lə mi nti sitinti. ⁴ Ite bə bɔyɔkpɔ əsuə básɔ wə bāmanklasə lə uyikabie əsuə, tsya ɛyɛ lə Onanto eto əsuəale əsuə, ótaka úbə nkpə. Nko esoo, bo mba tsya diyifo bani ku wə, ayɔkpɔ. Fɛɛ Onanto ebokpe bo nkɛale nya otakasə bo bə bo tsya bofo lesa nə ele bə buyifo lə mi nti buyifo, itsyise bo ku wə si nkpə lə Onanto eto əsuəale əsuə.

⁵ Beto mi əsuə bebe lə bisi nkpə lə bofokanɔ bomə əsuə. Bekatesə mi əsuə bebe kukɔnɔ. Lee bíunyə bitsyə lekpo biə Yesu Kristo kpe lə mi əsuə sitinti? Biyi nko, nyalɛ ibə bə binyə bitsyə lekpo biə bíambɔ béfe lə botokabe bomə əsuə.

⁶ Mfo nno miə biunyə bitsyə lekpo biə bo alɛɛ, bɔ́flo.

⁷ Bɔlɛ ola boto kato Onanto boə wəntə lə biyifo kolea saa nə leni lɛsɛ. Bɔlɛ nyamfo bɔtɔ, inni lə bufi boté betidi boə bɔ́flo lə bo batɔnkpe eto keyifo ka bɔnlɛ buyifo əsuə eso. Bomu bɔlɛ nyamfo bɔtɛyi bə lə mi kosate lə bikeyifo lesa nə ni lɛsɛ lə ibə bə bɔ́abɔ bɔ́fe lə boto kabe bomə əsuə kulaa tsya. ⁸ Itsyise boəmbofo kulesa buyifo kənyə lə Ditiki Sɛɛ nəmə əsuə, bomu lesa nə buyifo hã ni nə luusukosə ni setɔ. ⁹ Əsuə əyua bo lə binyə setɔsusu lə mi bofokanɔ əsuə, nya iyifo fe bo əsuəale əəbə kaso lə mi nti lə nnya əsuə. Nyaso tsya boato ola boə lə bebe bɛbɔ disi lə mi bofokanɔ əsuə nɛ. ¹⁰ Lə nyamfo eso minlɛ nyamfo bɔwɔni kətə mi lefe nə mimmbə mi lə ɔ́flo nɛ, itə bə lə mbə mi ɔ́flo, lə nyɛ mi etiki bunənko kekleke lə əsuəale nnya Bonamute ditə mɛ əsuə. Útə mɛ əsuəale nyamfo bə lə mi bofokanɔ lə bobɛ kato bumuə ale boso, nya inni bə lə ntə lə buyuə kɛnyɛ.

¹¹ Lə kalosəkɔɔ, mo bayimi, nɛ mi bokla miə bisia kukɔnɔ. Bebe bɛbɔ disi kenke lə mi bofokanɔ əsuə. Bitsyue koto bɛnɔ asa nnya kenke əsuə minlɛ mi kɔlɛ lə kukue komfo əsuə. Bitə lə mi kɛnyɛ lə keyifo kani nya lə bisia lə diyua əsuə. Nya Onanto wə laala betidi nya wə ətə diyuə, lə usiəko mi.

¹² Bisiasə mi bətsyua lə lelabi əsuə fe bayimi seka.

¹³ Bafokanɔfo kenke bə bəəsiasə mi!

¹⁴ Bonamute Yesu Kristo eto lefonə ku Onanto eto lelabi ku Lɛwɔnɔ Kenke eto ləniyifoyifo lə

disiəko mimble kenke.

**Onanto eto kakle ɔɔɔ; Sɛkpɛle
Sɛkpɛle: Onanto eto kakle ɔɔɔ; Sɛkpɛle New
Testament**

copyright © 2008 Wycliffe Bible Translators, Inc.

Language: (Sɛkpɛle)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

5fc03d2a-3cf8-5607-a6e0-9e1e197140bd